

Bas-Backer: Pomirenje nužno za poslijeratni oporavak

Pravda, istina, mir i oprost su četiri elementa u procesu pomirenja koji je nužan za poslijeratni oporavak, rekao je viši zamjenik Visokog predstavnika Peter Bas-Backer u petak u Beogradu.

“Nema pomirenja bez pravde, i nadređenost pravde ne može se izbjeći niti zamijeniti bilo čime drugim”, poručio je veleposlanik Bas-Backer sudionicima međunarodne konferencije o međuetničkom pomirenju i vjerskoj toleranciji na Balkanu, koju je organizirao Europski centar za mir i razvoj.

U tom pogledu, on je upozorio: “Izvanredan uspjeh Međunarodnog kaznenoga suda je zasjenjen činjenicom da ni odgovorne vlade ni međunarodna zajednica do sada nisu uspjeli uhititi šest najznačajnijih bjegunaca, prvenstveno Radovana Karadžića i Ratka Mladića. Činjenica da su Karadžić i Mladić još na slobodi i dalje ometa proces poslijeratnog pomirenja isto toliko koliko i vrijeđa bilo koji osjećaj da je pravda zadovoljena ili da se zadovoljava”.

Veleposlanik Bas-Backer je rekao da je “od suštinskog značaja da domaći sudovi u bivšoj Jugoslaviji ne samo nastave i ispune misiju Haškog suda, nego i da taj proces prihvate unutar domaće nadležnosti.”

Veleposlanik Bas-Backer je pozdravio razne inicijative usmjerene prema utvrđivanju objektivnih činjenica o sukobu početkom 90-ih godina. Bez toga, rekao je “postoji veliki rizik da se nagomilana tuga, gorčina i krivica pretvori u osobne i historijske mitove koji će bilo koju vrstu susjedske koegzistencije u ovom dijelu svijeta učiniti nemogućom”.

Viši zamjenik Visokog predstavnika je naglasio značaj dijaloga jer “on može spriječiti da nekadašnji neprijatelji nastave

dehumanizirati jedan drugog i konačno im može pomoći da ponovo žive i rade zajedno”.

Mir, istaknuo je veleposlanik Bas-Backer, neophodno je okruženje za obavljanje bilo kakvih aktivnosti na traženju pravde i istine, koji će u svoje vrijeme dovesti do oprosta.

“Proces pomirenja moraju predvoditi lokalni ljudi”, rekao je on. “Budući napori na izgradnji povjerenja i tolerancije uveliko će zavisiti od angažmana i opredjeljenja domaćih protagonista. Međunarodna pomoć i potpora će i dalje biti dobrodošla, ali pod lokalnim okriljem”.

“Pomirenje i obnovljeno povjerenje između nacionalnih zajednica zahtijeva svjesno opredjeljenje i naporan rad”, rekao je veleposlanik Bas-Backer. “Prolazak vremena može pomoći, ali on isto tako može zamrznuti neprijateljstva i traume. Zdrava ekonomija isto tako može pomoći, ali ona može i potaći intenziviranje konflikta oko podjele zarade. Ukratko, ne postoji ni izravan ni neizravan put ka nacionalnom pomirenju. Taj put se mora aktivno tražiti i za njega se mora boriti ako želimo da ova regija, ili bilo koja druga, uživa trajan mir i stabilnost”.

Puni tekst obraćanja veleposlanika Bas-Backera možete pronaći na adresi www.ohr.int.